

26/02/2003

MTUC, Cuepacs nyata sokongan

DUA gabungan kesatuan sekerja terbesar negara, menyatakan sokongan penuh terhadap pendirian antiperang yang disuarakan Perdana Menteri Datuk Seri Dr Mahathir Mohamad pada perasmian Sidang Kemuncak NAM ke-13 semalam.

Presiden Kongres Kesatuan Sekerja Malaysia (MTUC) Datuk Zainal Rampak menyifatkan pendirian itu sebagai berani dan tepat pada masanya.

Katanya, ucapan Perdana Menteri itu juga wajar dimasukkan sebagai sebahagian daripada deklarasasi NAM.

"Kenyataan Dr Mahathir adalah tepat apabila mengatakan negara kaya menindas negara miskin serta mengamalkan sikap pilih kasih," katanya Zainal.

Beliau berkata seluruh rakyat patut merasa bangga dengan sentimen yang dinyatakan oleh pemimpin negara itu.

"Rakyat Malaysia semua cintakan keamanan dan Dr Mahathir telah menyampaikannya dengan jelas kepada dunia," katanya.

Sementara itu, Cuepacs yang mewakili hampir 900,000 kakitangan awam, merasakan Dr Mahathir bertindak profesional dan adil dalam penilaiannya terhadap situasi dunia hari ini.

Presidennya Datuk N Siva Subramaniam berkata walaupun Perdana Menteri sering mengkritik negara maju, beliau juga menawarkan penawar bagi mengubati kelemahan mereka.

Beliau berkata semua kenyataan yang dibuat oleh Dr Mahathir telah difikirkan dengan begitu masak.

"Semua rakyat boleh merasa bangga dan megah dengan Perdana Menteri yang begitu arif dengan hal ehwal dunia," katanya.